

Date – 18/08/2025

Time - 07:30Hrs

HEADLINES (MORNING)

1. Mamit district Saikhawthlir ram chhunga Assam official-te'n rubber huan an tihchhiat chungchangah Mizoram leh Assam lam aiawh inbia chuan hotu sang zawk te inbiak hma chuan khawi lam zawk zawk pawhin kutthlak tawh rih loh nise an ti.
2. Tun thla ni 27 atanga tan tur Mizoram state legislative assembly fur thutkhawm a ngaihtuah atan dan thar siam tur leh dan dinglai siamthat tur pakhat ve ve a lut tawh.
3. Kumin July thla tawp atanga Myanmar atanga Mizorama rawn raltlan 32,000 chuang zinga mi 3,073 mit-naute leh kut ze thla lak a ni tawh.
4. Maharashtra Governor CP Radhakrishnan chu Vice President atan NDA candidate a ni dawn.

<><><>

BORDER DISPUTE

Mamit district Zawlnuam RD block chhunga Saikhawthlir ram chhung Diltlang Lui zau-a Assam official-te'n rubber huan an tihchhiat chungchangah nimin khan Mizoram leh Assam lam aiawh hotute leh Saikhawthlir khawtlang hruaitute thil thlenna hmunah kalin an inbiaa, hotu sang zawk ten inbiakna an neih leh hma chuan khawi lam zawk zawk pawhin kut kutthlak tawh hrih loh nise an ti a ni.

Puan tawh angin inrinni chawhnu dar 2 vel khan, Diltlang lui zau a Rubber tiak phun sa leh phun turte chu Assam lam police leh Assam forest lamin an tichhia a, Saikhawthlir VCP Pu Lalthuthlungmawia hnen atanga thudawn danin Assam police mi 8 leh Assam forest mi 2 te lokalin Diltlang lui zau a Mizoram Land Resources, Soil & Water Conservation Department-in a kalpui mek CM Rubber Mission hnuiaia rubber chingtute Rubber phunsa leh la phunloh rubber tiak 300 vel chu an rawn sam chhia a ni.

Saikhawthlir VCP Pu Lalthuthlungmawia chuan Diltlang lui zau ah hian VC ten ram thehin chhungkaw 15 ten eizawn nan rubber an ching a, Diltlang lui zau hi Assam lam chuan reserve forest area angah ngaiin thlai ngialnghet chin phal a nilo an tih avangin rubber tiak te pawh rawn tichhia an ni a, amaherawhchu hetia reserve forest area anga sawi si hian Gurguthi / Assam lam atang hian Assam mite chuan kuhva an ching thung a ni a ti.

Saikhawthlir khawtlang hruaitute chuan an khawtlang chhungkaw thenkhatin harsa tak a an hnathawh hetia tihchhiat sak an ni ta hi pawh an tiin sorkar atangin zangnadawmna dawng ngei se an ti a ni. Assam Police leh Assam Forest te hian tun thla ni 5 khan helai hmun ah tho hian lokal tawhin Rubber phun mek te hi an rawn en thli thlai tawh ni a sawi a ni.

<><><>

BIOMETRIC ENROLMENT

July thla tawp atanga Myanmar atanga Mizorama rawn raltlan 32,000 chuang zinga mi 3,073 mit-naute leh kut ze thla chu lak a ni tawh. Home department hotute hnen atanga thu dawn danin biometric enrolment hi July thla tawp lam atanga lak tan ni mah se, hartsatna hrang hrang avangin an kal chakpui hlei thei lova. District 11-ah kalpui ni mah se, an khawl hman chianguang lo leh internet signal tha tawh lote chuan an hna a tithuanawp nasa hle niin district hrang hrang official-te chuan an sawi a. Relief camp-a awmte a hlawma endik an awlsam rualin an fate hmun danga lehkhia zira awm an lo awm ve bawh avangin an biometric data lak kim a harsa an tih bakah chhungte leh thiante belte bakah mi in luaha awm hmun karkir tak taka awmte chu khawtlang hruaitute tanpuina an hmu chungin hun a duh hle niin an sawi bawh. A bik takin Myanmar raltlan mikhual tam ber Champhai district, raltlan 13,500 chuang awmna-ah hian mi 177 chauh an la chhinchhiah thei a. Official-te'n an sawi dan chuan July ni 31 a he hna an thawh tan khan kutze thla lakna khawl a chhiat avangin an kalpui chak thei lova, August ni 9 khan Aizawl lama chhukin home department-in khawl 2 an lo pe a, chumi hman chuan an kalpui chho leh chauh a ni.

Tun tum hi biometric enrolment chauh kalpui tura ngaih a nih lai-in biographic data pawh lak khawm nghal a ni a. Raltlan hming, nu leh pa, a lokalna khua, Myanmar a a awm lai leh Mizoramah enge a thawh tihte lak zel a ni. Tun hma khan mimal chanchin chhinchhiah hna hi kalpui chhuah vek a ni tawh a, temporary identity card pawh pek chhuah deuh vek an ni tawh chungin an dinhmun hi a danglam reng avangin mimal chanchin chhinchhiah hi thar thawh leh a nih thu home department hotute chuan an sawi a ni. Myanmar raltlan bakah hian Bangladesh Chittagon Hill Tracts atanga raltlan hi mi 3,000 tling lo an awma ngaih a ni a. Lawngtlai district-ah Bangladesh raltlan 2,000 chuang an awm a, Thenzawl khawpui-ah 299 awmin Lunglei district-ah Khawmawi khua-ah mi 63 an awm mek bawk a ni.

<><><>

ASSEMBLY

Tun thla ni 27 atanga tan tur Mizoram state legislative assembly fut thutkhawm a ngaihtuah atan dan thar siam tur leh dan dinglai siamthat tur pakhat ve ve a lut tawh.

Assembly secretariat atanga thudawn danin sorkar dan siam tur thar urban development & poverty alleviation (UD&PA) department atangin The Mizoram Local Body Ombudsman Bill 2025 chu thehluh a ni tawh a, hei bakah hian land revenue & settlement (LR&S) department atangin The Mizoram Land Revenue (Amendment) Bill, 2025 chu an dawng tawh bawk. Official resolution pakhat a lut tawh a, hei hi environment, forests & climate change (EF&CC) department atanga lut a ni. Hei bakah hian assembly inkhawma tawngka a chhan chi (starred question) 350 leh ziaka chhan chi (unstarred question) 124 a lut tawh bawk a ni.

Tun tum assembly fur inkhawm hi Assembly kal mek 9-na a inkhawm vawi 5-na tur a ni dawn a. Assembly speaker Pu Lalbiakzama hova business advisory committee (BAC) thukhawm chuan inkhawm hi ni 2 chhung ni turin an rel a. August ni 27 hian MLA ni lai thi ta Pu Lalrintluanga Sailo sunna hun hman a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

LADC

Lai Autonomous District Council-ah BJP hruaitu chief executive member (CEM) Pu N. Zangura kaihhruai sorkarin thlawptu a ngah leh ngah loh naktuk hian fiah a ni dawn.

Larsap Gen. Vijay Kumar Singh chuan Lai Autonomous District Council (LADC) Chief Executive Member (CEM) Pu V. Zirsanga’n Ningani kalta a banna a theh luh chu hemi ni vek hian a pawm a. Hemi ni vek hian United Democratic Alliance (UDA) legislature party hruaitu Pu N. Zangura chu CEM atan ruatin district council & minority affairs (DC&MA) department chuan Zirtawpni khan hriattirna chhuahin CEM atana Pu N. Zangura ruat a nih thu hi an puang a. LADC-ah sorkarna chelh thei turin thlawptu a ngah tawk em tih chu August ni 19-a finfiah turin a hriattir nghal a ni. Pu Zangura chuan thlawptu a ngah tawk leh ngah tawk loh fiahna (floor test) hi a awm a nih phawt chuan hlawhtling taka paltlang theih ngei a inbeisei tlat thu Akashvani Aizawl a hrilh a. Lai zirlai pawlte’n a hma ang khan harsatna an siam loh a beisei a, tun dinhmunah chuan boruak tha lo a awm lo niin a sawi a ni.

Puan tawh angin Pu V. Zirsanga hian LADC MDC te zingah thlawptu a ngah leh ngah loh Ningani kalta khan fiah tur a ni a. Dar 10 leh a chanve a fiahna atana council hall-a an kalkhawm hma lawkin larsap hnenah CEM atanga a banna chu LADC chairman Pu T. Zakunga kaltlangin a thehlut a. Chairman hian a banna lehkha hi council inkhawmah hian chhiar chhuakin fiahna hun hman a ni ta lova. Pu V. Zirsanga kaihhruai executive committee chu thiah a nih thu chairman hian a puang ta nghal a ni.

Tun dinhmun ah LADC mipui thlan MDC 25 zingah MNF-in 11, BJP 2 leh pawnlam atanga thlawptu Congress Member 1 nen UDA chuan Member 14 neiin, ZPM in Member 11 an nei mek a ngaih a ni.

<><><>

COVID

Tun dinhmunah Mizoramah Covid-19 hri kai enkawl lai an awm lo.

Integrated Disease Surveillance Programme (IDSP) hotute hnen atanga thu dawn danin August ni 8 khan Covid hri kai inringhlel mi 27 endik zingah 1 chuan Covid hri a kai tih hmuhchhuah a ni a. Hemi hnu hian mi 31 sample endik a ni leh tawh chungin Inrinni thleng khan hri kai hmuhchhuah belh an awm tawh lova. Thawhtanni, August ni 11 khan Covid-19 hri kai enkawl lai 11-te chu an vai a dam taka chhuahtir an ni a, hemi hnu hian Mizoramah hri kai an la awm leh rih tawh lo a ni.

Kum 2020 bul lama Mizorama Covid lo luh ve rinhlelhna a awm atanga tun thleng hian sample nuai 19, sing 9, sang 7 leh 943 endik a ni tawh a. An zinga nuai 2, sing 3, sang 9 leh 674 te chuan Covid an kai tih hmuhchhuah a ni. Covid hri kai zingah a vaiin mi 734 an thi a. Kum 2021 khan thi tam berin mi 538 thi chhinchhiah a ni a, kum 2022 khan mi 180 thi a chhinchhiah a ni a, kum 2020 leh 2023 khan mi 8 ve ve an thi bawk a ni.

<><><>

VICE PRESIDENT ELECTION

Maharashtra Governor CP Radhakrishnan chu Vice President atan NDA candidate a ni dawn. He thu hi BJP national president leh Union Minister, JP Nadda-a'n New Delhi-a party headquarters-ah a puang a, BJP parliamentary board meeting neih zawh a thuthar lakhawmtute kawmin JP Nadda chuan NDA thawhpui zawng zawngin he thutlukna hi an thlawp a ni a ti.

Hemi bakah hian Vice President inthlanna chu tha taka neih a nih theih nan BJP chuan party zawng zawng nena inremna siam a tum thu a sawi bawk a. kar kalta chhung khan he thil chungchangah hian NDA thawhpui leh eptu party-te biak an nih thu a sawi bawk.

He meeting-ah hian Prime Minister Narendra Modi, Home Minister Amit Shah leh Defence Minister Rajnath Singh te bakah parliamentary board member dangte an tel a ni. Vice President thlanna hi thla leh ni 9-ah neih a ni ang a, Jagdeep Dhankhar ban avanga inthlanna hi neih tur a ni.

<><><>